



**I**ohannes natus est in Sueuia ex Bremaco uilla Urspergenſi cœnobio uicina, anno 1481. Is à teneris annis operam literis dedit, atq; literarum fundamenta feliciter poſuit. Poſtea uerò ut commodius pietati & ſtudijs incumberet, Rockenburgē ſe monaſterium acceſſit, & Præmonſtratenſium ordinem ſuſcepit. Situm eſt illud in Sueuia duobus miliaribus ab Ulma, dimidio uerò ab oppido Fuggarorum Vueyſſenhorn, ubi fundatum & ædificari cœptum anno Chriſti 1126 à Bertholdo, Sifrido, & Conrado fratribus, & comitibus à Bireck. In eo loco cum Ioannes diu modèſtè uixiſſet, atq; multis uirtutibus ornatus eſſet, Anno 1529

omnium uotis abbas eligitur. Tum autem monaſterij ædificia partim bellorum cladibus, partim uetuftate collapſa præclare refecit, atq; celebrè ibi ſcholam inſtituit. Hoc modo cum per 16 annos optimè præſuiſſet, tandem 1543, ætatis uerò 62 obiit, & cum tali Epigraphe ſepultus fuit.